

## Evening Dogri News Bulletin,

07 March 2025 18:15 Hrs

### Headlines

- मुख्मन्त्री उमर अब्दुल्ला हौरें अज्ज जम्मू-कश्मीर विधानसभा च 2025-26 बरे लेई 1 लक्ख 12 ज्हार करोड़ रपे दा सिफर घाटे आहला बजट पेश कीता। इस बजट च केंद्र शासित प्रदेश दे चबक्खे विकास पर चेचा बल दित्ता गेआ ऐ।
- बजट 2025-26 च केई कल्याणकारी हीलें दा ऐलान कीता गेआ ऐ जिंदा मकसद कमजोर तबकें दे जीवन स्तरै गी बेहतर बनाना, महिलाएं दा सशक्तिकरण ते शिखा दे खेत्तर गी तगड़ा बनाना शामिल ऐ।
- उपराज्यपाल मनोज सिन्हा हौरें “तवी महोत्सव” दा उद्घाटन करदे होई आखेआ जे तकनीक ते कला बश्कार संतुलन दी बड़ी मती लोड़ ऐ।
- सेहत ते मेडिकल शिक्षा मंत्री सकीना इत्तू हौरें अज्ज आखेआ ऐ जे जम्मू-कश्मीर च कैंसर दा पता लाने ते एहदे इलाज लेई सेहत सरबंधी ढांचे दा दर्जा बधाया जा'रदा ऐ।
- राई-बाई मैह्कमे दे मंत्री जावेद अहमद डार हौरें अज्ज आखेआ ऐ जे किश्तवाड़ जिले च केसर सरबंधी राश्ट्री मिशन दे तैह्त 50 कमांस जिमीं गी नमें सिरेया तैयार कीता गेआ ऐ।

<><><><><><>

### CM Budget

मुख्मन्त्री ओमर अब्दुल्ला हौरें अज्ज जम्मू-कश्मीर विधानसभा च 2025-26 आहले ब'रे लेई 1 लक्ख 12 ज्हार करोड़ रुपें दा सिफर घाटे आहला बजट पेश कीता। इस बजट च केन्द्र शासित प्रदेश दे चबक्खे विकास पर चेचा बल दित्ता गेआ ऐ। नेशनल कांफ्रेंस दी अगुवाई आहली सरकार च मुख्मन्त्री ओमर अब्दुल्ला हुंदे कश खजाना मैह्कमे दी बी जिम्मेदारी ऐ ते उ'नें अज्ज विधानसभा च अपनी इस सरकार दा पैहला-पैहला बजट पेश कीता।

इस मौके पर मते सारे सदस्यें जबरदस्त ढंगै'नै ताड़ियां बजाइयै उं'दा अभिवादन कीता। ओमर अब्दुल्ला होरें अपने भाषण दी शुरु करदे होई आखेआ जे खजाना मंत्री दे तौर उप्पर अज्ज ओहू अपना पैहला बजट पेश करै करदे न ते एहू पिच्छले 7एं बरें च पेश कीता गेदा पैहला बजट बी ऐ। उं'नें आखेआ जे नेहू महत्वपूर्ण समें उप्पर जम्मू-कश्मीर दे खजाना मैहकमे दी कमान सांभना इक बड़ी बड़ी जिम्मेदारी ऐ ते इस जिम्मेदारी गी निभाना उंदे लेई बडे मानै आहली गल्ल ऐ। ओमर होरें आखेआ जे एहू बजट इक नमें ते खुशहाल जम्मू-कश्मीर लेई रूपरेखा आहला दस्तावेज ऐ जेहड़ा जम्मू-कश्मीर दे लोकें दिएं आसें-तांगें गी दर्शाने दे कन्नो-कन्नी आर्थिक विकास, समाजी तरक्की ते टिकाउ विकास लेई इक मजबूत बुनियाद बी रक्खै करदा ऐ।

<><><><><><>

## Budget Highlights

ओमर अब्दुल्ला हुंदे आसेआ अज्ज पेश कीते गेदे बजट च रोजगार, उच्च शिक्षा ते खेड्डें सरबंधी खेत्तरें बक्खी चेचा ध्यान दित्ता गेआ ऐ। सरकारै ऐलान कीता ऐ जे भर्थिएं दे कम्मै च तेजी आंदी जाहग ते ध्याडीदारें दे मसले हल करने लेई बी विचार कीता जा'रदा ऐ। उं'नें गलाया जे जेके-पीएससी ते जेके-एसएसबी आसेआ कीती जाने आहली भर्थी प्रक्रिया गी तेज कीता जाहग। ई'आं गै स्कूली ते उच्च शिक्षा दे खेत्तरें लेई 1 जहार 388 करोड़ 97 लक्ख रुपें दी तजवीज़ कीती गेई ऐ। 2024-25 बरें लेई कीती गेदी तजवीज़ शा एहू 242 करोड़ 75 लक्ख रुपे बद्ध ऐ। तोआई अज्जै दे बजट च जम्मू-कश्मीर च खेड्डु ढांचे गी तगड़ा बनाने बक्खी टकोहदा ध्यान दित्ता गेआ ऐ। इस सरबंधे च एहू ऐलान कीता गेआ ऐ जे डल झील ते बसोहली इलाकें च पानी आहिलएं खेड्डें मतल्लक केन्द्र बनाए जाडन। एहदे अलावा राजबाग ते खेल गांव, कन्डोली नगराटा जम्मू च जिमनास्टिक अकैडमी, प्रदेश च 4 क्रिकेट अकैडमियां, 2 यूथ होस्टल ते हर इक जिले च खरी कारकरदगी आहले सिखलाई केन्द्रें दे निर्माण दा बी ऐलान अज्ज पेश कीते गेदे बजट च कीता गेआ ऐ।

<><><><><><>

## Budget Welfare Measures

मुख्यमंत्री ओमर अब्दुल्ला होंरें अज्ज केन्द्र शासित प्रदेश जम्मू-कश्मीर दा बजट पेश करदे होई केई कल्याणकारी हीलें दा बी ऐलान कीता जिं'दा मकसद कमजोर तबकें दे जीवन-स्तरै गी बेहतर बनाने सने महिलाएं दा सशक्तिकरण ते शिक्षा दे खेत्तर गी तगड़ा बनाना बी ऐ। आकाशवाणी दे जम्मू संवाददाता दी रिपोर्ट मूजब, जम्मू-कश्मीर सरकारै बजट च, अन्तोदया अन्न योजना तैह्त औने आहले सब्भनें परोआरें लेई 200 युनिट मुफ्त बिजली दा ऐलान कीता ऐ। एह्दे अलावा, अन्तोदया अन्न योजना दे सब्भनें लाभार्थिं गी औंदी पैहली अप्रैल थमां हर म्हीने 10 किलो मुफ्त राशन थ्होआ करोग जेह्दे'नै समाज दे आर्थिक तौर उप्पर कमजोर तबकें उप्पर पौने आहले माली भार गी घट्ट करने च मदाद थ्होग। इस्सै चाल्ली गरीब कुडिं दे ब्याहें च मदाद आहली योजना दे तैह्त दिती जाने आहली रकम गी 50 ज्हार रपें शा बधाइयै 75 ज्हार रपे करने दा ऐलान बी अज्जै दे बजट च कीता गेआ ऐ। महिला सशक्तिकरण दे लेहाज कन्नै बजट च जेह्डा इक होर बड्डा ऐलान कीता गेआ ऐ ओह्दे मूजब, जम्मू-कश्मीर च सब्भै महिलां, औंदी पैहली अप्रैल थमां सरकारी बस्सें सने ई-बसें च बी मुफ्त सफर करी सकडन। प्रदेश दे लोकें गी पीने आहला साफ पानी उपलब्ध करोआना जकीनी बनाने दे मकसद कन्नै सरकार, इस बारे जम्मू-कश्मीर दे बक्ख-बक्ख हिस्सें च पानी दी जांच आहिलयां 98 लैबाटरियां खडेरोग। इस गेंह कन्नै पानी दी गुणवत्ता च सुधार होग। बजट च इक होर बड्डी घोषणा करदे होई ओमर अब्दुल्ला होंरें खित्ते च कनून दी पढाई लेई नेशनल लॉ युनिवर्सिटी स्थापित करने दा ऐलान बी कीता ऐ ते एह्दे लेई बजट च 50 करोड़ रपे बक्खरे रक्खने दी तजवीज़ कीती गई ऐ।

<><><><><><>

## Budget PDP

पीपुल्स डेमोक्रेटिक पार्टी नै विधानसभा च अज्ज पेश कीते गेदे बजट दी सख्त निंदेआ करदे होई नेशनल कांफ्रेंस दी अगुवाई आहली सरकार उप्पर लोकें कन्नै चुनाएं दरान कीते गेदे वायदें गी पूरा करने च नाकाम रौहने दा दोष लाया ऐ। आकाशवाणी दे जम्मू संवाददाता दी रिपोर्ट मूजब, पीडीपी नै आखेआ ऐ जे बजट नै नेशनल कांफ्रेंस दे चुनावी घोषणा पत्तर ते ओह्दी सरकार दे बश्कार दी बड्डी बित्थ गी सब्भनें दे सामने लेई आंदा ऐ। पीडीपी नै आखेआ ऐ जे नेशनल कांफ्रेंस नै सब्भनें गी 200 युनिट मुफ्त बिजली देने दा वायदा कीता हा पर हून उन्नै एह

फैसला छड़ा अंतोदया अन्न योजना दे लाभार्थिं लेई गै अमल च आहनेआ ऐ। पीडीपी नै आखेआ जे जम्मू-कश्मीर च 16 लक्ख शा मते राशनकार्ड धारक न जिंदे चा छड़े 95 जहार गी गै इस योजना दा लाह थहोग ते एह कुल आबादी दा छड़ा 5 शा 7 फीसद हिस्सा गै बनदा ऐ। पीडीपी नै नेशनल कांफ्रेंस उपपर लोके दे विश्वास गी त्रुडने दा आरोप लांदे होई आखेआ ऐ जे बजट दे ऐलान कोला पैहले अंतोदया अन्न योजना दे कुल लाभार्थिं चा 1 लक्ख 27 जहार लोके गी हटाई दित्ता गेआ जेहड़ा सरकार दी मंशा उप्पर सोआल खड़े करदा ऐ।

<><><><><><>

### Itoo Cancer Treatment

सेहत ते मेडिकल शिक्षा मंत्री सकीना इत्तू होरे अज्ज आखेआ ऐ जे जम्मू-कश्मीर च कैंसर दा पता लाने ते एहदे इलाज लेई सेहत सरबंधी ढांचे दा दर्जा बधाया जा'रदा ऐ। मंत्री होर विधानसभा च विधायक तनवीर सादिक हुंदे आसेआ पुच्छे गेदे सोआलै दा परता देआ करदिआं हि'आं। उ'नें दस्सेआ जे आबादी आधारित कैंसर रजिस्टरी मूजब, 2018 थमां 2024 बश्कार कश्मीर च कैंसर दे 50 जहार 551 मामले ते जम्मू संभाग च 13 जहार 912 मामले दर्ज कीते गे। उ'नें इब्बी गलाया जे हर ब'रे इ'नें मामले च 2 फीसद शा 3 फीसद तगर दा बाह्वा दिक्खने गी लब्धै करदा ऐ। मंत्री होरे दस्सेआ जे जम्मू-कश्मीर च कैंसर दे मरीजे गी स्किम्स श्रीनगर ते जीएमसी जम्मू च माहिराना इलाज दित्ता जा'रदा ऐ। उ'नें इब्बी जानकारी दित्ती जे स्टेट कैंसर इंस्टीच्यूट जम्मू च 3 आपरेशन थेटरे ते 10 विस्तरें आहले आईसीयू दा निर्माण कम्म मेद ऐ जे इस म्हीने दे अखीरै तोहड़ी सबूरा होई जाहगा।

<><><><><><>

### Saffron

राई-बाई मैहकमे दे मंत्री जावेद अहमद डार होरे अज्ज आखेआ ऐ जे किशतवाड़ जिले च केसर सरबंधी राश्ट्री मिशन दे तैहत 50 कमांस जिमीं गी नमें सिरिया तैयार कीता गेआ ऐ। आकाशवाणी दे जम्मू संवाददाता दी रिपोर्ट मूजब, मंत्री होर विधानसभा च सुनील कुमार शर्मा हुंदे आसेआ पुच्छे गेदे इक सोआलै दा परता देआ करदे हे। उ'नें दस्सेया जे करसाने गी बक्ख-बक्ख खेत्तरे च माली ते तकनीकी सैह्योग बी दित्ता गेआ ऐ। मंत्री होरे दस्सेआ

जे इस जिमीं दे कायाकल्प लेई 5 ज्हार 465 लाभार्थिएं गी माली सहायता दिक्ती गई। इस पूरे मिशन दे तैह्त्त करसानें गी 2 करोड़ 52 लक्ख 86 ज्हार रपें दी सब्बिडी बी उपलब्ध करोआई गई ऐ। मंत्री होरें गलाया जे केसर सरबन्धी राश्ट्री मिशन दे तैह्त्त करसानें गी सिखलाई देने गितै 10 कैप लोआए गे ते द'ऊं दिनें दे अंदर तकरीबन 250 करसानें गी लोड़चदी सिखलाई दिक्ती गई।

<><><><><><>

### LG-Tawi Festival

उपराज्यपाल मनोज सिन्हा होरें आखेआ जे तकनीक ते कला मझाटै इक संतुलन बनाने दी लोड़ ऐ ते विज्ञान ते तकनीकी खेत्तर च होआ'रदे नमें इजाद साह्डी सभ्यता लेई बड़े महत्वपूर्ण ना। एल.जी होरें एह गल्ल तवी महोत्सव दे त्रीये संस्करण दा उद्घाटन करदे होई आक्खी। एह कार्यक्रम अमर महल च हरि तारा चेरिटेबल ट्रस्ट आसेआ आयोजित कीता गेदा हा। एह कार्यक्रम अमर महल संग्रहालय ते पुस्तकालय दे 50 बरे पूरे होने दे जश्न दे इक हिस्से दे तौर पर बी मनाया जा'रदा ऐ। अपने संबोधन च उपराज्यपाल होरें आखेआ जे विज्ञान ते तकनीक नै नमी-नमी स्थूलतां उपलब्ध करोआइयां न ते मनुक्खी समाज दे कम्मकाज ते जीवनशैली गी इक नमा रूप दिक्ता ऐ, पर एह आधुनिक साज, कला ते संस्कृति दी समृद्ध परम्परा बगैर अधूरे ना। इस मौके पर उपराज्यपाल होरें प्रधानमंत्री नरेंद्र मेदी हुंदे मार्गदर्शन च 'विकास भी विरासत भी' दे संकल्प कन्नै कम्म करने दी सरकार दी बचनबद्धता गी फही पक्का कीता।

<><><><><><>

### Int'l Women's Day (2 bytes)

कल दुनिया भरै च महिलाएं सरबन्धी अंतर्राश्ट्री ध्याड़ा मनाया जाह्गा। भारत सरकार नै बी महिलाएं दी दशा च सुधार ते उ'नेंगी उबड़ा चुक्कने दे मकसद कन्नै केई योजनां रम्भी दि'आं न जिं'दा लाहू पिच्छले किश ब'रें दरान केई सारी महिला उद्यमिएं गी हासल होआ ऐ। इ'नें योजनाएं दा लाहू ठोआंदे होई केई महिलां अज्ज आत्मनिर्भर बनियै होरनें गी बी कम्म-रोजगार दे मौके उपलब्ध करोआऽ करदिआं ना। रामबन जिले दे बटोत ब्लाक थमां

उम्मीद योजना दी लाभार्थी पूनम देवी ते रीमा देवी, ऐसिआं द'ऊं महिलां उद्यमी न जेहिडियां अज्ज होरनें दे जीवन गी बी संवारने च अपना जोगदान देआ करदियां ना। इस सरबंघै च अपने तजुर्बे सांझे करदे होई पूनम देवी ते रीमा देवी होरें गलाया

<><><><><><>

### Schemes Women's Day Reasi

केंद्र सरकार आसेआ महिलाएं दे सशक्तिकरण गी बढावा देने दे मकसद कन्नै बक्ख-बक्ख पैहलकदमियां चलाई जा'रदियां न तां जे महिलां आतमनिर्भर बनी सकन ते आर्थिक तौरा पर सशक्त बनी सकन। इसै सिलसिले च रियासी जिले च परिवर्तनकारी बदलाव दिक्खेआ जा'रदा ऐ कीजे इस खित्ते दियां महिलां बक्ख-बक्ख सरकारी योजनाएं दा लाहू ठोआइयै सामाजिक विकास च सक्रिय रूप कन्नै हिस्सा लै करदियां ना। स्किल इंडिया, बेटी बचाओ-बेटी पढाओ, मुद्रा योजना ते राष्ट्रीय ग्रामीण आजीविका मिशन जनेह प्रमुख फलैगशिप योजनाएं तैहत रियासी दियां महिलां नमें कौशल हासिल करा'रदियां ना। निक्के-मुट्टे कारोबार शुरू करा'रदियां न ते आजीविका हासिल करा'रदियां ना। ऐसी गै द'ऊं महिलाएं जेड़ी बक्ख-बक्ख सरकारी योजनाएं कन्नै लाहू हासिल करियै अपने आप गी सशक्त करै करदियां ना। उनें आकाशवाणी समाचार कन्नै अपने विचार सांझे करदे होई आखेआ।

<><><><><><>

### Reasi-Women's Day

अंतरराष्ट्रीय महिला दिवस दे जश्न दे इक हिस्से दे तौरा पर रियासी दे आधार जित्तो ग्रांड च स्कॉस्ट जम्मू आसेआ इक कार्जक्रम दा आयोजन कीता गेआ जेदे च ग्रामीण महिलाएं बदी-चढियै हिस्सा लैता। इस कार्जक्रम दा आयोजन वाइसद चांसलर प्रो. बी.एन त्रिपाठी ते Director Extension प्रो. अमरीश वैद हुंदे मार्गदर्शन कन्नै होआ। इस मौके पर प्रो. त्रिपाठी होरें जेड़े इस कार्जक्रम च मुख परौहने बी ऐ हे, लैंगिक समानता ते महिलाएं दे हकें ते उन्दे सशक्तिकरण पर बल दित्ता। एहदे अलावा उनें महिलाएं दी स्थूलतें लेई न्यूट्री गार्डन्स ते Biofortified Crops दा बी जिक्र कीता। इस कार्जक्रम च माहिरें महिलाएं दी शिक्षा, उन्दी सेहत, कैंसर बारै जागरूकता ते

होरनी सरबंधत विषयें बारै गल्लबात कीती। इस दौरान इक सेहत जांच शिविर बी लोआया गेआ जेदे कन्नै 300 शा मती महिलाएं गी फायदा होआ। स्कास्ट दे एनएसएस आस्सेआ अंधविश्वास का व्यापार विषे पर इक नुक्कड़ नाटक बी पेश कीता गेआ। मीडिया आहलें कन्नै गल्ल करदे होई वाइसं चांसलर प्रो. बी.एन त्रिपाठी होरें आखेआ।

<><><><><><>

## Spl Programme

कल मनाए जाने आहले अंतर्राष्ट्री महिला दिवस दे सरबंधै च आकाशवाणी जम्मू दे क्षेत्रीय समाचार एकांश आसेआ कल 8 मार्च गी 20एं मिंटें दा इक विशेष कार्यक्रम प्रसारित कीता जाहग। इस कार्यक्रम च स्हाडे परौहने होडन। जम्मू युनिवर्सिटी दि'आं प्रोफेसर सपना सांगड़ा ते गरीब कुड़िं गी मुफ्त अंग्रेजी दि'आं क्लासां देने आहली तान्या शर्मा। इस कार्यक्रम दा प्रसारण कल बडुलै 7 बज्जियै 10एं मिंटें थमां लेइयै साड्डे 7 बजे तोहडी कीता जाहग ते इस दरान बक्ख-बक्ख खेत्तरें च महिलाएं दिएं उपलब्धिएं, संघर्षे ते जोगदानें उप्पर लोऽ पाई जाहग। इस कार्यक्रम गी तुस मीडियम वेव 303 मीटर यानि 990 किलोहर्ट्ज़, एफएम 100 इशारिया 3 मेगाहर्ट्ज़ ते डीआरएम 981 किलोहर्ट्ज़ पर सुनी सकदे ओ।

<><><><><><>